

Visoki predstavnik lobira za daljnju podršku Bosni i Hercegovini

Visoki predstavnik, Wolfgang Petritsch, trenutno boravi u New Yorku i Washingtonu gdje lobira za daljnju podršku mirovnom procesu u Bosni i Hercegovini. Na jučerašnjoj godišnjoj sjedinici Generalne skupštine UN-a održane na nivou ministara vanjskih poslova, visoki predstavnik se sastao sa podsekretarom UN-a za mirovne operacije, gospodinom Jean-Marie Guehennom, i portugalskim ministrom vanjskih poslova, gospodinom Jaime Gama. Uz to, Visoki predstavnik se kratko sastao i sa ministrima vanjskih poslova Hrvatske, Češke Republike i Švicarske.

Visoki predstavnik je informisao gospodina Guehennoa o aktivnostima koje, pod vođstvom OHR-a, međunarodne civilne organizacije u BiH provode u cilju ostvarivanja njihove bolje organiziranosti i maksimalnog učinka u BiH u tom kontekstu. Visoki predstavnik ima zadatak da prezenitra opcije za buduću policijsku misiju koju bi trebalo uspostaviti nakon isteka mandata UNMIBH krajem slijedeće godine. Tokom svojih razgovora sa gospodinom Guehennom, visoki predstavnik se pohvalno izrazio o aktivnostima UNMIBH/IPTF-a koji su izvršili reviziju kvalifikacija za rad preko 24.000 policijskih službenika, uspostavili multietničke policijske snage – iako proces restrukturiranja policije još uvijek nije u potpunosti završen – obučili hiljade policajaca u različitim aspektima policijskih dužnosti, te uspostavili Državnu graničnu službu. Visoki predstavnik i gospodin Guehenno su se saglasili da će puna podrška UN-a u procesu uspostave strukture koja će nastaviti značajne aktivnosti UNMIBH/IPTF biti od krucijalnog značaja za uspješnu primopredaju dužnosti mogućoj budućoj misiji.

Pri susretu sa gospodinom Jaime Gama, portugalskim ministrom vanjskih poslova koji će 1. januara 2002. godine preuzeti dužnosti predsjedavajućeg OSCE-a, visoki predstavnik je razgovarao o budućoj ulozi ove organizacije u kontekstu efikasnijeg rada međunarodnih organizacija u BiH. U tom smislu naglašena je tradicionalno tijesna saradnja između OHR i misije OSCE-a u BiH, kao i sjedišta ove misije u Beču.

U okviru aktivnosti koje su pratile sjednicu Generalne skupštine UN-a, Visoki predstavnik je nekoliko ministara, koji su sudjelovali u njenom radu, upoznao sa trenutnom situacijom u BiH. Visoki predstavnik je tako o razvoju situacije obavijestio i ministra vanjskih poslova Češke Republike, gospodina Jan Kavana i ministra vanjskih poslova Švicarske, gospodina Joseph Deissa. Visoki predstavnik je kratko razgovarao i sa hrvatskim ministrom vanjskih poslova, gospodinom Toninom Piculom, osvrnuvši se na nova politička dešavanja vezana za hrvatski narod u BiH, kao i na provedbu Odluke Ustavnog suda BiH o konstitutivnosti sva tri naroda u oba entiteta.

Visoki predstavnik će se danas sastati sa ministrom vanjskih poslova Španjolske, gospodinom Josep Piqueom. Ovaj sastanak je od posebnog značaja s obzirom da će u januaru 2002. godine Španjolska preuzeti predsjedavanje Evropskom Unijom. Visoki predstavnik će se također sastati sa gospodinom Mark Malloch Brownom, šefom Razvojnog programa UN-a (UNDP). Visoki predstavnik namjerava da sa gospodinom Brownom razgovara o budućem angažmanu UNDP-a u BiH, posebno u vezi sa oblastima u koje je UNDP aktivno uključen kao što su deminiranje, provođenje Plana aktivnosti međunarodne zajednice za Srebrenicu i provedba reforme državne službe.

Krajem sedmice, visoki predstavnik će otputovati u Washington DC gdje će se sastati sa zamjenikom državnog sekretara, gospodinom Richard Armitageom i drugim visokim zvaničnicima

State Departmenta, kao i sa predstavnicima Svjetske banke i Međunarodnog monetarnog fonda (IMF).